

Danas odgođene utakmice 4. kola PL: Široki ruši lidera prvenstva?



Zaostale utakmice 4. kola Premijer lige Bosne i Hercegovine bit će odigrane večeras. Derbi će na stadionu "Pecara" igrati Široki Brijeg i Sarajevo, dok Zrinjski na stadionu "Pod Bijelim brijegom" dočekuje Zvijezdu 09.



Sarajevo će protiv Širokog pokušati nastaviti niz dobrih rezultata i zadržati prvo mjesto na ligaškoj tabeli. Aktuelni prvak BiH nakon pet mečeva ima ostvarene četiri pobjede i remi, što je i s utakmicom manje dovoljno za lidersku poziciju.

Široki je u ovoj sezoni ostvario tek jednu pobjedu. U prošlom kolu Širokobriježani su na svom terenu "prokockali" prednost od 3:1 protiv Željezničara, koji je na kraju utakmice osvojio bod.



Meč protiv Sarajeva će biti veliki ispit za hercegovački tim, a pobjeda bi mu sigurno značila mnogo za nastavak sezone. Trener Denis Ćorić izjavio je da je pobjeda za njegov tim imperativ i da žele tri boda.

Zrinjski važi za velikog favorita u domaćem meču protiv Zvijezde 09, iako Mostarci nakon pet mečeva imaju učinak od dvije pobjede, remija i dva poraza. S druge strane Zvijezda 09 je ostvarila dva remija i tri poraza, pa je teško očekivati da u gostima može učiniti nešto više protiv viceprvaka BiH.

Susret u Mostaru počinje u 19, a u Širokom Brijegu u 20 sati. (F, tl – Foto: Arhiva)

Date: 28-08-2019